

FIGU INDIA

Nois li namca sa figu morisca,
est tantu 'ona, ma est 'ispinosa;
regogli del 'a manu, tia Franzisca
jughet totta sa pedde iscabbiosa.

Est tantu saporida cand'est frisca,
si la mandiga calda est dispettosa;
sa pulpa in corpus diventat pedrosa,
chi non s'inde dogirit una liscia.

Leo s'ammonto, unu continentale,
c'ancora ne ischiat su segrettu,
est bistadu tres dies tantu male.

Pro lu curare, custu furisteri,
cando sa purga ne l'hat fattu offettu;
Hana jamadu su...Piccapedreri!!!

(Prunischodda)

SA DENTIERA

=====

Cando nd'est ruttu s'ultimu caninu,
mandigant sempre a sa lezzera;
manzanu e sero, ai cussa manera,
'Ogni die pulenta e simulinu.

Com'est ferradu a nou, Costantinu,
su dentista l'hat fattu sa dentiera;
cando riet, sa zente furistera,
lu leat pro Rodolfo Valentinu.

- "A'hat fattu veramente impressione,
l'happo nadu, t'agatto tantu forte,
come sò zertu, mandigas benone" -.

- "Ma sò senza 'inari, in pesu t'ista.
Chie mandigat bene, mala sorte,
pro como est solasente... Su dentista!!!

(Prunischedda)

MASSAJU ISFORTUNADU

=====

Si pesat chitto chitto su manzanu,
est bezzu, totta vida hat trabagliadu,
s'istrada est l'nga, su campu est lontanu.

Sende giovanu, haiat sondiadu,
famiglia, domo, fizos e affettu,
e Deus bonu, 'ogni cosa l'hat dadu.

Poi, pro mala sorte, o pro dispettu,
est restadu 'e nou solu solu,
senza fizos, pro domo unu pinnettu.

Saludat custu 'ezzu campagnolu,
dogni manzanu, su primu ispiragliu,
'e su sole, e s'iscaldidi a consolu.

'Istat totta sa die in su trabagliu,
sos pilos canos, sa lughe indeorat,
cun sos'attrezzos, de punta e de tagliu.

Non chilcat nudda, solu a Deu onorat,
coltivat pro campare appena appena,
su bicculu 'e sa terra chi laorat.

Lu cuntentat su sero, pro sa chena,
unu biccul'e pane, infust'in binu,
chi l'iscaldit su samben'in sa vena.

No malaighet mai su destinu,
Dogni manzanu, torrad'a su campu;
a bon'ora si ponet in caminu.

Cantas boltas sa lughe de su lampu,
illuminadu l'hat sa caminera,
chi deviat passare a giampu giampu.

'Ogni desizu sou? Una chimera,
pro isse est sempre jerru, sempre attunzu,
no hat connottu mai primavera.

Sa fadiga, su sole, su deunzu,
l'hat fattu a sa 'ezzesa diventare,
abboltijadu, e nieddu che brunzu.

Massaju sighi ancora a trabagliare,
mancari sias gai, pagu forte;
isettende pro poder riposare....
Sos'ultimos carignos.. de sa morte!!

(Prunischedda)